

四庫全書

集部

欽定四庫全書

集部

考功集卷三

四

詳校官中書_臣葉元符

中書_臣劉源溥覆勘

覆校官中書_臣康儀均

校對官中書_臣葉蘭

謄錄舉人_臣馬衍宗

欽定四庫全書

考功集卷三

明 薛蕙 撰

五言古詩

贈何大復

昔我弱冠日翩翩綴文辭發藻翰墨林志意縱橫飛慷慨惟古人自言不足為歷覽百千年揚馬乃吾師雖非絕倫才王子幸見知一朝邁嘉會英俊相追隨追隨親交者四海皆匹儔矧復適我願得與子同遊惟爾當今

時聲名溢皇州陵邁班與張卓犖屈宋流興文何韓曄
世儒焉可侔慚予非子友何以結綢繆綢繆不相棄感
子意纏綿自負窈窕姿何言謂我妍吁嗟知己人自古
亦皆然嫵婉三歲間朝夕共周旋金石豈為固膠漆匪
云堅如何忽分析使我心嬋媛嬋媛傷人懷紆軫無終
極送子臨衢路泣涕霑胸臆願言從子邁安能有羽翼
浮雲逝不返飄風不我值江河廣無梁山高不可陟嘆
息何所道但言長相憶相憶亮何益怨此去路長昔者

同心友今為參與商人生百年內倏忽若流光良會復
何時一別殊未央君其篤平生慰我遙相望斯言儻弗
諛傾想惠來章

贈孟望之四首

迢迢東流水悠悠遠行子送子出邁時離別自今始山
川一間之相去日千里徘徊蹊路側思心從中起人生
百年內聚散誰能止壯年豈再得良時不可俟念我平
生歡眷眷未云已

驅馬城門陽舍馬登山邱攜手立踟躕還顧望皇州皇
州一何麗藹藹皆王侯冠蓋似浮雲賓客自相求衢路
豈不廣之子不得留慷慨內傷心為子獨懷憂

昔余與君子未見心相知邂逅在今辰果若平生時願
得結歡好贈子以新詩含意未及申行行復何之念當
從此去彷徨出郊畿行人倦往塗終言與我違倉卒執
手間嘆息空相持愧無晨風翼送子起翻飛

踟躕郊野外白日匿西山行人去有期安得久周旋請

為游子吟與子結纏綿憂來動人心惻愴不能言言念
平生友意氣非徒然行役不足辭貧賤非所憐君其篤
明信慰我心惓惓

贈張仲脩二首

青青豫章樹寄生濁水泥風波摧以傷不如蒿與藜吁
嗟貧賤士子行何栖栖昔為猛虎步今為觸藩羝忠信
獲罪辜有願不克諧英雄一失據反覆良可哀

采藿東門側終朝喟長嘆虹霓干白日朔風何飜飜興

言念我友攬衣涕洟瀾金虎構宮鄰罹此百禍端有鳥
孤飛翔悲鳴奮羽翰逝言不我顧戀戀傷肺肝

叙歸

干祿恥虛薄依方託踈慢偃息雖久淹幽棲寧若晏一
朝幸時會逝言遠遊宦端服朝閭闔抽毫謁雲觀短迹
乏高足弱植謝貞幹豈同漸陸羽乍類登天翰役役感
羈旅悄悄懷歸嘆悵望承明廬徘徊霸陵岸脩路歷城
闔初服返里閨園墟申宿諾壤石改新翫陟榭瞰東田

尋溪沂南澗竹樹互遶迴魚鳥共凌亂平生覽往昔即
事踐昏旦冥寂資神理牽攀防世難梅生入會稽龐公
去江漢傷哉古今慮絕景山岩畔

過城西野

初服性已曠久痾志仍疲豈謂傷淫滯偶以戀棲遲聿
來年歲遷驟省節物移晴陽改陰候暖律變暄吹晨發
高闌曲夕驚清川湄白雲生幽沚綠水激層涯外感耳
目超內尋神蘊披泛濫滄洲趣髣髴崑山姿揆已信薄

劣遭時易磷緇來復雖不遠往蹇豈能追孟晉終何迫
罷歸聊所宜願言在弗諉援毫申此辭

晚起

花上露乍晞林端霞已照幽人倚戶起春禽迎日叫
昔苦束帶疲今知散髮妙方同嵇公懶豈顧管生誚

夏夜

逍遙避暑地玄夜敞陰扉涼風池上滿白露月中稀
玉釵乍續墜翠竿不停揮淹留時未輟向曙乃言歸

田中築舍修治樹藝

莊生卧濠梁范子去海隅行止信難侔遠跡要不殊伊
予慕棲遁脫冠歸里閭卜宅近郊坰葺宇就田廬南榮
面崇岡北牖背幽墟雖非山水地取樂自有餘築牖仍
先趾穿池即故渠林木盡舊行圃畦皆曩區寡欲罕所
營衆美亦云俱爵祿無常位貧賤有安居豈惟畏淹留
得以免憂虞懽此平生情永言焉可渝

晚出齋中

園中明晦異日晏氣候齊餘光杳西傾圓景迴東躋叢
木夾空廂涼颭扇幽閨稍稍陰籜翻翩翩夜禽啼美人
間遨遊即景自招携褰裳出北戶杖策佇南階俯察雙
渠涌仰視三星低真賞恒在近至鑒故不迷神往迹難
留志存理無睽寄言山林客安用登雲梯

冬初

開冬肇時序時序異疇曩烈烈嚴氣升肅肅玄陰敞同
雲匝阡陌凝霜被榛莽寒暑鑒迭代休咎究消長郊原

值窮節庭戶息群響疾病倦淹留寤寐縱偃仰感物殷
懷抱離人絕心賞幽獨豈無悶至樂非外獎形變化隨
逝意愜神俱往永解區中緣安排契真想

除日

悠悠天北運冉冉日西靡茲年俄且周薄暮亦云已端
居撫辰序靜言感化理時來變窮節事往乖壯齒託疾
侔長卿歸田擬平子處困豈不難執操良足恃瑣瑣旅
客志坦坦幽人履莊周貴達生伯陽戒知止尚公識損

益賈傳辨憂喜在昔仰玄訓于今寤微旨即此怯塵慮
因之蹈靈軌

丙子十月二十八日初發鄉邑述征有作

旅宦添從事卧病輟歸田俛仰似昨日往再踰三年末
路謝貞素積習慚夤緣整駕別鄉邑薄言重徂遷瞻途
背梁宋振策指幽燕昔往遺維繫今來就糾纏豈伊行
役嘆畏此平生僇嬰世迫物累撫化懷冥筌齊契百年
內高揖千載前慮存跡匪虧意愜道仍全斯言俟明哲

因歌遂成篇

憶句曲山寄顧英玉

夙齡諷圖謨，微尚寄邱壑。神期雖未并，斯衷固無怍。江
南僊靈地，句曲奧且博。孔記述形蹟，河篇表經略。青磴
下崎嶇，丹壁上岵嶸。靡靡被石苗，噦噦戲雲鶴。聞道甘
閒曠，養病困疲弱。即趣懷同好，贈言負前諾。巖廊竊已
忝，江海自堪託。敢希東都金，且訪西山藥。

苦暑

朱明戒夏令大火次南國溫風有增響旱雲多異色宵
眠惕朝旭旦坐望夕景伊鬱不可聊恬曠何由得靜勝
昔嘗解神昧今始惑如何平生懷未建古人則感物百
慮作遺生羣動息撫中俄有契履運似無即單生忌外
彫張子患內逼幸是捐心累終然謝通識

候大駕回

西北收皇旅東南歸帝京山驅八駿下海汎六龍行後
車環外區前駟集神垵支兵連四校中堅屯九營絳氣

曳朱竿青雲生翠旌
銑歌綵吹激行漏玉鸞鳴
入覲萬國至清宮
群后迎金貂雜流景
圭璧委繁星錄功對五
帝合符朝百靈俯窺地
紐正仰瞻天柱平郊裡
方展義升封將告成
祈招美王度長謠頌休明

祀陵作

幽陵首衆嶽朔海揔群川
形蹟閼烏策圖象隱瑤編
時晦貞期遠運開昌命先
遷都既相宅遺冢乃登仙
翠鳳舞丹阜蒼龍蟠紫淵
叢谿杳藹藹積岨肅芊芊
園塋環

列隧殿寢被曾巔房御清以謚神路峻且玄悽愴山庭
露蕭瑟松門煙光景緬如存春秋俄屢遷聖情鬱終古
睿思蘊遐年周衛物惟備崇樹禮仍虔歲事展哀敬孝
享竭明蠲百靈妥宗室九列翼皇筵東德躬所闕陳歌
志未宣曾是厠末位僂俛謝朝賢

秋日署中簡諸君子

新秋改炎節涼臻溽暑旋淒淒金氣舒昭昭素景鮮流
風靡幽薄輕靄映澄川飄颻激楚吹眇杳泛蘭煙吏隱

案牘簡齋居神想偏目耽霞上鶴耳玩露中蟬几席縱
偃息纓紱謝牽纏卧閣趣無輟含毫興邈然西曹擅文
苑蕭晨惜暮年徘徊錦帳坐吟嘯白雲篇望美勤徒結
懷勞憂莫蠲賞心儻不隔答訊冀相傳

贈饒平令曹先生

炎方信巨麗海嶠彌光輝衝波迅交屬斷岫峙相圍銅
乳隱雲穴金膏被石碕青林互繚繞玉草競芳菲嶺戍
接丹徼縣齋當翠微寨開盡洲島偃卧同巖扉高閣祇

自閑鳴琴方獨揮心和物皆定欲靜神來依靈境邈難
測異人游豈稀虛無翡翠蓋髣髴芙蓉衣安邑儻可累
吾將從此歸

雨霽閒望

池邊風嫋嫋竹裏影微微薄暮西山曲蕭條涼雨歸伏
檻看秋色四睇亂清輝哀猿連谷響迷鳥隔雲飛朝市
名仍繫林壑興難違眷言反初服蘅杜尚芳菲

看月

秋氣麗華月月華麗層穹餘輝稍熠爚流影漸曛曠臨
水寫珠綴紫花映綺櫳蘭林團墜露桂樹鬱迴風佳人
在何許咫尺限西東殷勤離緒濶寂寥懽讌空陸生北
堂上謝客南樓中音息一以緬思心安可窮星漢屢淹
薄展轉夜難終可惜芳菲節羈處怨飛蓬

贈劉子緯

朝與佳人期相望愁欲盡夕與佳人隔相思笑復隱西
園佇飛蓋東郊滯歸軫嚶鳴悅和響芳菲悲戚隕室邇

怨鄭謠媒勞哀楚引抑念聊可忘含情詎能忍

對雪簡崔洹野何大復

清陰含洞房淒氣飄飛閣起視綠雲中白雪乍飄落紛
紛集青瑣盈盈舞羅幕玄沼涌珠花翠苑棲瓊萼良辰
眷悅豫幽居感離索有酒今若斯思君共斟酌

雪後翫月作

朝眠高閣內吟弄風前雪夕登曲榭上游盼雲中月月
出輕雲斂雪罷流風闕連輝有餘映紫光無斲輟首眺

懷乍新闌賞景彌絕雙陰相蔽虧並彩互明滅炎寒俄聚散弦望劇盈缺撫物亮固然孤衷異懽悵

長安西門候朝

隱隱夕唱傳肅肅宵車驚茲夜方向晨中心憚將暮朱華淪未啓瑤光儼初度絳霄麗明月素飈流藻霧嚴防限中禁周廬扃內附岵嶺北宮朝徙倚西墉步矚目紫微宇蹠足玉堦路矯迹承華側徒慚班振鷺

答何大復

宵懽不繼晨朝游豈延夕歎念未云周勞心彌已積篤
好追昔悰興言撫今戚纏綿金玉音參差翰墨跡開帙
虛雲閣臨觴闕瑤席惠思荷來章褰裳奉良覲

月夜坐憶

明月三五時流光千里外虛館風泠泠寒墀霜靄靄不
見南樓客徒憶西園蓋懽酒無盈觴憂襟有餘帶沉吟
靜夜思緬邈佳人會

過孫世其館中

傾暉隱闌晷屯陰升初宵陟降並招携游衍共逍遙坐
檻仰層穹披戶聆清飈羅星照高牖行雲動微綃旁眺
稍閤閤極望亦寥寥即此蓄心賞眷言詠長謠

訪史內翰不遇

回車望雲寧攬衣陵霧術山齋晚猶閉幽人朝已出拂
石矚新詠窺牕規散帙含情不可憇徘徊悵如失

何中翰夜集

寥寥玄冬夕穆穆北堂譙徘徊芳翰詠慙慙羽卮薦霧

卷三
幌入鮮月風甕下微霰自顧恥薄虛何因屬深暎

崔太史席上詠翠杯

綺坐倦朝歡翠杯出宵酌月艷寫疑空雲光挹愁落碧
醴共玲瓏華燈增照灼一得侍君閒終言厠醕酢

詠御溝鴈

太液春風起瀟湘鴻鴈歸照水翹圓趾隨波弄短衣曲
池稻梁足上林矰繳稀由來江海性還從塞北飛

雜詠

六首

詠風

蛾眉簾下出春風
花際來雲落鬢間
髮蟻轉手中杯華
梁塵乍動羅幃影
復開試將巫山雨
吹向楚王臺

詠燭

客醉北堂上花生
夜戶中色亂歌梁
月影暗舞衣風珠
簾照不隔羅幌映
疑空願得陪長譙
相看曲未終

詠屏風

屏風十二曲羅列
洞房隅雙環金屈
膝四角錦流蘇蛾

眉行處隱玉袖坐中扶因歌留上客翠蓋少踟蹰

詠蒲

昔聞詠塘上今見翫池中紫茸含細蕊綠帶舞輕叢蜻
蛉高下逐翡翠往來通徘徊桂蘭渚竟日與君同

詠萍

參差如霰布的鑠似星出魚戲影初開鳥散文猶密幸
因雲雨會且免風波失無裨江海流徒謝芳菲質

詠兔絲

根株不自立枝蔓為誰飾偶同雜組文未比朱絲直園
客何由整天女詎堪織暫附松栢枝終辭霜露色

荅祝禮部

屏居寡懽愛懷痾積悲戚勞君惠繁翰結言慰離析荒
楚向踈蕪寒花方寂歷良辰已云暮清揚不可覲

贈士奇允升

暮春黃鳥飛始悲歡晤稀首夏朱櫻熟重嘆離居速離
居何契濶沉憂鬱難豁君同汲黯疾予有相如渴偃息

閉東軒扶杖一窺園遲遲雲日媚萋萋卉木繁素書既
滿几清酒亦盈尊此時微二子賞心誰與論

秋日感懷

白露墜何早清風淒已寒今茲復秋日悵爾切悲端三
十未聞道一官祇素餐區區諒無補惴惴詎能安撫已
每多念逢時恒鮮懽徒然抱慙恨嘆息歲將闌

舟行雜詩九首

金門再捐佩滄洲一振衣沿洄歷秋水偃仰盼清輝塞

鴈尚未發檣烏還解飛臨流聞楚調為我送將歸
避地諒非願游吳或有託今我匪伊人心期偶如昨行
役多憂苦棲遲詎為樂君看岸上蓬秋風益飄泊
白露晚來生汀洲把杜蘅浮雲西北返孤客且南征習
習野吹急汙汙川漲平徒看秋潦盡未可俟河清

息徒指川裔繫纜臨叢薄飄飄散襟帶風吹零露落俯
折岸邊蘭仰聽雲間鶴寄言天路上共爾遠矰繳
秋雲翠可鑒明河景如髮川上夜寥寥徘徊望新月流

光睇轉近餘輝攬還沒念彼同懷人關山日起忽

木落風雨夜水生蘭蕙洲已值清秋日旅客思悠悠感
時臨歲晏惜逝對川流此際亟歸去蕭條難久留

行子怨路長長路方漫漫前瞻但雲霧却聽空波瀾銷
憂命懽酌取樂興哀彈安得晨風羽紆我懷歸嘆

朝辭枉渚泊夕驚清川路經過方自今神期宛如故沉
吟招隱曲徘徊遠游賦西北有浮雲行行一返顧

桂嶼饒涼吹蘭皋足素氛鳥疑沙上霧魚避水中雲寥

廓有欣矚蕭閒無厭聞行將入江海長對白鷗羣

郭外治宅

抱瘵謝交游棲閒避紛濁郊廬未云遠已覺心綿邈屏
居聊寄拙營室惟從樸茅茨無結構房櫳罕彫斲門庭
褊蕪穢牀帷多蘚駁方因遁蓬蓽更欲蓄硤堦灌園希
仲子易農哂方朔無云尼父譏遽鄙樊須學

詠料絲燈

淮南玉為盃西京金作枝未若茲燈麗擅巧昆明池霏

微狀蟬翼連娟倅網絲煙空不礙視霧弱未勝持碧水
點葱鬱彩石染姜蕤霞疊有無色雲攢深淺姿焚蘭發
香氣對燭映紅滋明月詎須侈夜光方可嗤

游西郭

向晚思觴酌西郭翫芳菲風花半未落林鶯猶自飛殘
景初移席涼氣稍侵衣褰裳及將晏無使露中歸

首夏

寥寥塵外意更對蕭然境竹竦檀欒葉雲起嵯峨影跡

幽疑避喧神虛匪耽靜
嗒爾此端居唯知晝方永

冬夕

空齋生夕靄
俛仰俄清絕
開帷翫光景
就檻看雲月
寒條響哀吹
曾林皓餘雪
懷人不可見
徒令自怡悅

曉坐齋內

近曙早鶯喧
乍暖游絲密
稍稍竹待風
紛紛花就日
臨堂點芳翰
披衣翫仙帙
賴此自多娛
整緩幽憂疾

郊館

夜雨旦初霽郊館試窺臨東風急花水朝日麗雲林多
景每難遇幽期還易尋端由來序速倦思坐相侵

始還別業春際游覽

結宇帶層曲列牖俯雲端幽篁上交錯恠石下叢攢春
際聊騁望園中皆可惟芳林秀丹萸綠水散清瀾余本
支離者平生茲考槃淪飄從遠役留滯守微官言邁祇
云易思歸方慮難悵然迫遲暮五載始投冠迨此尋棲
息復得遂盤桓撫心殊已愜日夕廢朝餐

西郊

清曠自有素寧獨在幽深誰謂西郊地宛似南山岑四
野多景色青春晴復陰鮮雲冠綠苑迴飈翔翠林寢疾
託閒逸即趣恣登臨嬰累悼自昔取適懽在今豈嗟時
易顏但顧樂難任穿池玩游儵種木候鳴禽將營人外
賞聊賦邱中吟

行園

巾駕入邱樊披榛理園囿前臨古墟路却望清渦曲經

營闢池館周流羅卉木風落繽紛葉露冒歲蕤竹窈靄
殊冬夏寂寥異昏旭野陰當晝暝水氣先秋肅少壯旅
衣冠疲病歸農牧蹉跎任情性蕭散諧心目雅懷名山
意益厭人間俗歲晏終如何行行訪巖谷

郊居作

池籩鮮珍鱗樊籠多鍛翮物情忌窘束人事傷紛拙
薄謬榮塗踈慵謝朝籍銷聲背諠競息影投幽隙邱園
雖寂寞悠然殊自適徘徊弄文史流連眷泉石神輕片

雲上目瑩清川激蓬嶠宛相聞滄洲如在覲未申隱淪
志稍習湛冥跡外慕非所希聊用終晨夕

曉出東田遂游溪上

鳥鳴曙色至雲收春氣鮮寐覺啓南扉顧步出東田遇
賞乍淹留乘景更貪緣折芳順蘅薄涉水弄珠泉感來
憂已忘神往樂俱捐宵默任真游蕩漾契靈筌何待崑
邱上騰化始為賢

齋夕

觀書每成倦徒倚憑齋閣煙景翳山池春陰斂花萼衰
侵迫惆悵節變乖行樂不有恬然想何因堪寂寞

暮春園中作

荒徑入園墟經旬曠游涉林飄依檻絮蔓引橫階葉春
闌意已倦風晚花如怯憮然閱徂景彌使憂相接

對雨

病困怯炎蒸陰雨差相慰芳林洗花藥綠野籠雲氣坐
憶郭西池芙蓉定開未

答顏惟喬

俗紛倦城肆放浪懷林莽命賞來芳訊探奇協幽想蕭
條南苑際中夏猶淒爽雨霽綠泉生風驚白雲上禽魚
行盼睠水木坐俯仰梁棟下陰霏房櫳遞哀響淪飄病
轉劇偃蹇年日長名山仍未去末路竟何往故人念相
慰賤子擬自廣旦日佇登臨願言操几杖

游城南園林

用開襟濯寒水為韻

崇邱亘中野逶迤似層臺斜攀陰磴上下見涼雲開對

酒已判醉無勞歌管催

徙倚薦蘿逕徘徊松桂林尋雲延遠步窺水瑩幽襟微
子共行樂終然孤賞心

別苑命飛觴平沙徙行幄藉蘭初解帶拾藥俄盈握迴
策步前溪塵纓仍自濯

麗札昔相約名園今共看雨苔晴亦濕風篠夏猶寒永
日倦高宴清歌時向闌

日落風景佳中園霽氛滓輕雲染松色清露飄蘭藥新

暑漸炎蒸重來翫溪水

城西亭子宴集

用桂棟留夏颺為韻

逐涼向何許平臺俯煙際青臯杳重疊素水縈迢遞酒
冷渚邊雲衣芳苑中桂一遇林下期仍偕塵外契

攀林摘朱果汲井牽瑤甕涼風拂露榭清氣流雲棟四
時俄轉瞬萬緒紛如夢相顧各喟然中飲可辭痛

抱痾慨獨卧恣興欣同遊蹇芳薜荔苑窺鳥鵲鵲洲日
暝石潭淨風涼雲樹稠坐看夕景晏與君仍暫留

幽渚携風策層阿，息煙駕亭亭荷。照景嘒嘒蟬吟夏，低徊悟形變索莫。慙時謝自緣心有念，臨觴屢驚咤。

永日避炎暑，中園屏煩囂。登危乍悽愴，臨迥更蕭條。積水含密霧，空林送新颺。眷言攄幽抱，援翰賡長謠。

八月十四日夜餞伯昭五首

以園景早已滿為韻

秋堂慘別酒，夕幌傷離弦。酒停弦亦闕，乍睇望舒圓。窈窕度清漢，空濛浮素煙。此時一弭思，再徙風中筵。

筵徙杯復傾，風罷衣猶冷。懽意始依依，憂心終耿耿。茲

遊並偶坐後別侶孤景婉孌惜流光攜手夜方靜
靜夜未遽央華月出尚早微氛映脩竹皓露散芳草殷
勤遲暮日緬邈平生好及茲暫晤語安能寫懷抱
抱懷不可寫徘徊詎云已漸聆寒漏促屢顧清陰徙宵
深河歛素曙近雲成綺願子引餘觴為別悵伊邇
邇別非久淹征駕憇南館黯黯金波滅離離玉繩斷緒
言殊未竟積思俄已滿行矣念相慰裁音異無緩

郭外

置酒命交游巾車向城郭徘徊空野外樂緒翻蕭索涼
風變雲日白露驚川薄秋水增烟霧衰林半搖落良時
一若此人生詎如昨援琴寫哀弄停觴罷懽酌愧彼忘
情者孤悰似無託

寄劉希尹

代馬怨殊羣越鳥懼同族如何平生愛分背乖心曲悠
悠間鄉縣冉冉踰涼燠念子行寡偶我居亦甕獨疲疴
輒逃位饑寒方殉祿出處雖未同身世均羈束山林鮮

疵吝市朝多寵辱寄言訊之子遲望歸來躅

夕詣郊外

久瘳積幽抱端居乏謹趣日夕覽郊園俛仰增愁慕林
靜動風颭川迥來雲霧征蓬駛且斷棲鳥驚還聚感物
悟時變憂生測年暮衰顏漸已迫稚齒誰能駐淹留歲
方晏沈吟日云屢有懷空若茲無聞良可懼

晚遊墟中

獨行墟里路歸來秋景夕鴈落清川永鶴唳荒林寂超

遙跡乍遠優游意彌適寄言簪組士擾擾真堪惜

自西野循渦曲臨眺贈同遊者

養拙非藏器寢痾豈逃名進慚冠蓋群退慕邱園耕多
病齒髮暮屏居懷抱盈稍尋臯壤樂暫慰蹉跎情入野
緬曲折臨谿屢迴紫霜濃石道淨水歛雲潭清煙景淡將
夕汀洲遙微明踈蕪岸篠落寥戾川禽鳴心賞夙所重
身累適已輕豈辭疲曳倦幸與良遊并濟時謝明哲量
已保幽貞願從求羊輩放曠終吾生

卧病賦懷

工拙詎同區通蔽固殊致由來辟世者未逮匡時智伊
余本踈誕屏跡歸朝寺非材託閒散孤賤違榮利邴子
忌多秩嵇公病為吏雖微二賢操猶全匹夫志適已每
多慰養生仍寡累方探至人旨始慕神仙事玄覽矚昭
曠冥棲佇靈異白雲存髣髴滄洲形夢寐淵虬無近韻
霄鵠有遐意願結松喬侶人間聊可棄

雜詩

五首

植草會成蔓種木當為株休咎豈虛生景響不相踰呂
生釣奇貨蘇子挾陰符六國假相印萬戶割名都一朝
計不售倉卒蒙罪辜狙詐適自困傾巧定焉如生時諒
非榮既沒辱有餘達人安貧賤貴欲弭禍樞

富貴使心惑嗜欲致行妨宴安損性靈美疾生膏肓吾
觀古來士高躅互相望首路或暫同中道更蒼黃班生
嗣前烈馬融遁遐方藉梁奄為累附竇終自戕通人識
尚爾咄咄可悲傷小人難久要君子貴其常草木有貞

心歲晚盛芬芳

玉以采自斲丹以澤自銷高才耀當時荼毒竟相招傅
子感飛蛾張公喻鷦鷯思患豈不微履險果焉逃千金
憚垂堂胥靡易登高願隨方外士杖策歸蓬蒿

神龍徙魚笱靈鳳違兔置至性炳幾先憂患寧相加在
昔有明招引身蹈幽遐豈無當世心岐路多網羅於陵
勵清操接輿肆狂歌寂寥以為侶自然以為家紛華非
不榮反覆將如何

伊昔學干祿忝竊造中朝時來豈自期奮跡階雲霄秉
筆屬西署改服廁東曹公卿競推引賢俊慕遊遨微滿
近傾覆中心憂且勞興言命旋駕偃息就林臯浮沈各
有宜趣舍實相遼諒非高門士聊欲恣逍遙

冬夜

高閣寂已夕清陰淡如霧林塘正寥落霜月轉幽素
真非境累賞勝由神悟倚戶望西園無人共微步

舟中看雨

微照下亭臯輕雲翳川曲一望春波上蕭條煙雨綠餘
花飄近渚衆鳥喧深竹借問同行子何處停舟宿

志感 二首

二儀育萬物四時代寒暑三五咸哲王質文有今古聖
人貴通變愚者或未睹周公興禮樂光翼兄與父宣尼
謀魯國一變道斯舉舊章不可忘季世賴毗輔苟能繼
先志改制固法祖國家歷年祀庶績罔不叙乘時宜損
益更化俟明主愧無賈生書今日悟當宁

聖王久已徂方策不俱逝大者載詩書遺烈播無際猗
嗟德不泯文章亦相儷吾觀三五蹟曠代若同世區區
漢唐來群儒猶善繼歲挺竹素間君相賴攸濟皇朝屬
全盛重光施來裔自非良史才大業有瑕翳願言見作
者綴緝列凡例紛綸括群典倣儻襲六藝言文行則遠
斯理良匪細惓惓告在位秉筆當勿替

贈別翟廷獻

燕酒沽玉壺彈箏唱吳歆四坐咸寂寞停觴但踟躕踟

蹢送將歸故人與我違當春對歌酒愁思無芳菲憶昔
同棲泊長安競行樂朝野盛懽娛朋曹何灑落休澣及
朝昕追遊越城郭東第盡王侯西山具邱壑秋月韻鳴
弦春池喜華酌流酒平原飲儻蕩鄱陽謔良時易徂謝
同心忽離索浮沉別岐路聚散殊今昨之子宦中州余
方尋故邱譙國望梁藩咫尺抱離憂攀嵇虛往駕訪戴
稀來舟空投三歲字詎申千里遊今王繼百六龍飛自
南服年開嘉靖號祥符大橫卜西雒群振鷺東園叢修

竹一辭北山隱再忝南宮錄判袂屢愆期隨牒忽來茲
過逢暫以笑勞苦翻成悲君謂久遊梁俗態好蒼黃寧
容長卿慢競笑次公狂當戶忌芳草投人疑夜光以此
污微官不如還故鄉感君誠不偶顧我今何有儒効卒
無聞官箴竟多負一割慕鉛刀千金慚敝帚循省但空
虛悲傷就衰朽衰朽遽幾何良會將無多昔遊接形景
今別邈山河白雲梁苑色綠水蓬池波留連暮春日殷
勤遊子歌歌闌日向斜遊子起登車臨歧欲有贈何因

解咨嗟鍛羽異鴻鵠存身乃龍蛇行行念自愛無為怨
天涯

太嶽詩三章贈陸元望少參之武當

荆楚富名嶠太嶽氣雄哉雲杪擢珠林天中懸玉臺遙
遙人境絕肅肅神君來

神君集福地文祖樹靈宮金銀列城闕藻繪搖烟虹蕭
然僊局吏坐嘯青山中

青山好棲遯朱門倦淹薄空握五芝圖坐恐三花落儻

傳招隱曲願附南來鶴

省中賞牡丹是日喜雨得知字

嘉卉含含采芬榮還及時茲言喜雨日忽值看花期四
月春草歇南宮韶景遲烟扶翠柯立風折絳房披珠樹
安足種僊人應未知何如翰墨署共攬芳菲枝賞勝自
難偶時和方在斯作霖懷相業憂旱體皇慈厠燕已云
忝屬歌諒非宜空然搦赤管詎報瓊瑶辭

雨中姚氏園候客

朝日變陰靄滿園啼鳥聲坐看微雨至彌憐芳樹清綠
波洗沙嶼碧蘚翳山楹此時遲嘉客臨觴無限情

桂洲詩

白雲覆秋水桂樹在中洲美人行笑歌攀援以淹留竭
來游宛洛歲暮增離憂著書子當歸遲我艤扁舟

蒲汀詩

四首

鳳飛俯丹穴龍遊顧珠淵神舉豈無娛冥期方眇然哲
人抗殊迹昭世冠群賢聲華雖館閣賞寄乃山泉

泉源出山下蒲生徧汀曲波中演漾春沙際參差綠離
離映寒草冉冉依荒竹發地闢蘭皋臨流葦荷屋

荷屋積芳馨蒲汀轉幽敞蒼茫起暝色寂歷含秋響白
鳥狎魚梁丹瑩入書幌淹留江海思曠絕風塵想

風塵謝高韻廊廟企鴻猷適已道雖勝匡時智彌優德
人鮮凝滯大化任沉浮終叅子房幄始泛鴟夷舟

徐子容薜荔園十三詠

思樂堂

徂謝迫邁期悠邈成今昔平生行樂地彷徨覩遺迹寒
飈起危館曙露依幽石象設尚如存神游眇安適

石假山

君家洞庭畔猶嫌去山遠園隈構石岫林際開雲巘迤
邐帶華池崎嶇入層苑不載扁舟來臨流詎能返

水鑑樓

可憐池上樓俯映池中水點綴畫難成分明鏡相似雲
移荷芰下魚戲房櫳裏素景一離披知有微風起

風竹軒

綠竹自便娟復值微風集暝色
颯將寒秋聲輟還急琅玕
欹易折翠羽紛難拾幽人最惆悵攬衣空竚立

蕉石亭

芳草如翠幄亭亭冒巖阿丹梯承晚映碧澗寫秋柯
日入烟霧滿夜來風雨多預愁霜雪至為樂恐蹉跎

觀耕臺

東菑及農節高臺試登陟阡陌路逶迤陂塘水紆直歷

歷原上耕依依隴間食雖無耒耜勤端居增歎息

薔薇洞

洞口薔薇樹春來冉冉紅停舟綠水曲携酒綵雲中穿
林入窈窕牽葉望玲瓏祇謂躋攀盡望望轉難窮

荷池

臨水放蘭桡處處花相觸霞水共參差香風時斷續上
看繡羽亂下睇文魚逐日暮未歸來聊就舟中宿

栢屏

何時別陵上移居來後庭牽條擬峰勢總葉學山形白
雪轉自綠綵雲相對青無勞台嶺側陵虛搏翠屏

留月峰

陰崖抱嵌竇倒景如明月玉氣夜逾妍珠光朝未滅雲
歸暈正滿霧上輪初缺西園讌客處臨翫情無輟

通冷橋

隔崦聞秋籟行尋窺碧山雨過沙岸曲泉吐石梁間雲
深乍浙瀝風起更潺湲緣源欲何極日夕未能還

花源

曲水寫珍池盈盈送紅萼朝來湖上雨吹此繁花落
旒紫魚藻徘徊逗蘭薄含悽眺芳渚劇念春銷鑠

安陽道中留別崔子鍾

伊昔游京邑周旋預簪裾親仁值賢哲汎愛及頑疎出
處或異趣聚散罕同居今來再晤對奄忽十載餘十載
俱南北行路何傾側色斯子奮飛明夷我垂翼失道愧
先迷知幾服深識握手慘無言撫心空歎息歎息亦何

為述遭丁此時鳳至樂周德麟傷悲魯衰既往亮無及
將來猶可追所憂日月逝壯志已陵遲陵遲竟無成世
故更相嬰平生陷悔吝晚節企幽貞無咎庶言慎有祿
不可榮要子同心事千秋揚令名

贈劉希尹

曰余田野人勝冠弄文墨自顧在泥塗敢言生羽翼儀
封誤眄睞汝南虛獎飾竭來長安道復與君相識伊君
本卓犖聲華光岱岳氣高稷下辯文當淹中學禮闈同

貢薦宰府聯登擢何意他山石濫廁荆岑璞當代論交
地如君真寡二周旋幸嘉會提携辱高義仙曹多暇日
帝京饒樂事朝隨紫陌遊夜集華堂醉清時信難偶世
故俄紛糾我方釋詔獄君已遭讒口金虎正縱橫玉馬
空奔走憫默各傷心蒼皇一分手升沉難預計往復更
遷逝失勢蘭化芻乘時董為帝愚士故繫俗達人解其
契寵辱安足驚脫略人間世征塗積冰雪游子辭京闕
惆悵北風詩眷戀河梁別昔為金石交今為雲雨絕擾

擾離筵散曖曖行塵滅親交日以稀心緒重多違同人
既遠謫孤客亦懷歸雲霄憚投足風塵思振衣願言乞
骸骨從君俱奮飛

釣磯

釣磯上斗折偃仰俯石瀨曾雲來目皆清波鑒衣帶捫
葛聊為綸持荷還作蓋高情豈羨魚逍遙在塵外

月夜望雪

朝看雲際雪夜坐月中樓宛似青天上俯觀銀漢流猶

憐目未盡好為上簾鉤

贈王山人

古有形法家史官常著錄王生世其術胸中羅海瀆為
我談形勝九州如在目手持諸公詩詞華爛珠玉吾聞
古者葬溝壑為槨積緣情棺槨易彌文宅兆卜古道日
陵夷異哉末代俗送死徒空言實傲生者福昔人信恬
淡今人苦多欲紛紛哀世事利塗寧異躅天地無終極
陵谷屢翻覆縱觀大化中千載亦云促既死惟所遇生

卷三
取衣食足不貪以為寶斯言當自勗

贈蘇允吉侍御二首

逃虛喜同人絕絃悲異代獨行增永懷賞廢有餘慨平
生友英俊末路離懽愛何圖蓬藿間復與親仁會知言
甚合符定交果傾蓋先民夙所仰斯人固其輩鴻才何
炳蔚雅行乃韜晦官聯侍從列意寄風塵外相望已勞
積辭訣能無槩差池惜良晤繾綣見交態吾衰采真游
子賢熙帝載一結同心言當令歲寒在

鹿鳴美野草君子貴贈言聞善樂相告此義古所敦若
人信名世乘運佐義軒觀風練國體游藝究詞源求友
及薄劣作賦賁邱園感彼詩人語何以報璵璠曰余嗜
樸學自信莫能諉舉俗不見是惟君期討論立言非不
朽功德鮮常存逐末事終小得一道斯尊外物棄浮雲
貴已養靈根願招同懷客共入無窮門

小園舊名退樂中丞馬敬臣先生改曰常樂因
為題榜兼賦古詩二章見贈蕙敬次韻奉酬

且記吾園得名之始

西原亡舊業南郭得新廬開荒築塲圃改徑通村墟達
人賞我趣遠訪林間居年德非可親氣味略未踈傾盖
語移日縱談懷抱舒置酒瑩心亭促席臨清渠然竹煮
山茗炊黍薦園蔬贈詩借高論題榜忝名書雖榮華袞
袞自顧實空虛平生志尋樂憂患每有餘好學謝希顏
寡過願師蘧守節欽兩龔知止企二疏微公蘊真鑒晤
語復誰與

荒園負城郭窮巷翳榛莽誰云一區小我懷殊自廣結
茅尚素樸種竹愛蕭爽樂此林廬就忘彼年歲長自予
釋纓紱一紀脫羈鞅獨學嘆孤陋成性愧存養稍知天
路近欲陟未能上希音寡偶和好事莫來往遂輟邱中
琴千載寄遐想晚遇林慮公折節猥相訪望洋增大觀
披雲快高仰諒非溫伯子何以酬心賞

贈李子西

自余友君子寒暑僅三易始見歡如故再遇契逾昔周

旋尚無幾歎眷良已積常恐人事乖及茲果離析枉駕就我別執袂城南陌舉觴忘獻酬坐客皆悽惻愛深悲不淺辭盡意何極霄漢子奮飛山林余偃息出處苟同心楚越非異域

送林汝雨提學嶺南

聖人久不作命世豈無人賢哉白沙翁崛起南海濱研幾見智崇固窮占道醇吁嗟百年後斯人不可聞儒林實淵源庶官非等倫君雖舊史氏選擇典斯文番禺名

都會多士何彬彬之子允師表先正有遺塵千仞獨高
逝九淵終自珍出處苟不審性命諒奚云衰俗日陵夷
我懷難具陳風聲繫先倡典刑期再新嘉會亟增脩江
門堪問津贈言同心友景行良可遵

日暮

日暮坐東軒直望西山曲白雲藹藹至雨我窓前竹茲
晨憚隆暑披衣廢朝沐徙倚乘夕涼清風散炎燠大象
幹流行變化一何速日新諒無取年長祗多辱古人善

補過嗟爾當自勛

寄穆玄菴

昔游西海上明月落吾手欲訪識珠人惟有玄菴叟山
川阻且長望望空搔首由來稀世寶知者故希有

菴中

市聲入墟落甕牖未全曉蟲飛亦薨薨焉知此生小群
動隨天運宇宙長紛擾獨有菴中人冥然化機表

贈孔汝錫

河清非難俟鳴鳥亦易聞傷哉獨立者異代無同群調
鍾欲誰須獻玉祇自勤士為知己死古人豈徒云我生
信多幸激賞遇夫君清襟似淵徹妙論若蘭薰寂滅契
玄理英華包藝文方欣暫晤對遽愴遠乖分迢迢長安
日杳杳大梁雲預愁夢中路舉目空氤氲

南園對月與孔汝錫

避俗每郭外養痾亦園中索居無與娛君子欣來同孟
夏日猶短初筵俄景終幸茲三五夕可令詩酒空移席

陟亭榭緩帶弄絲桐落霞稍西沒朗月已升東湛湛竹
上露泠泠松下風眺聽盡昭曠懷抱轉冲融詎厭綠觴
滿但愁良夜窮留連非荒樂悵別方匆匆

邱中

蕭條風雨散淒清松桂冷邱中一游睇處處雲霞影稍
愛夕陽佳復聽秋聲靜遙懷賞心侶歲暮空延頸

寄浚川先生

覽公談玄作贈公詠玄篇尋仙願未果懷舊心悠然掘

衣游郡齋言詩偏賞激束書謁京邸交臂俄分折中歲
再見公置酒浚郊廬自此若參辰形迹緬相踈一別二
十年相思定深淺獨游郭南園憶公如在眼稷契亮天
功巢許好山棲同生堯舜世出處安能齊退藏誠自揣
明教何濫與愧非伯齊倫謬當公叔舉我年已遲暮我
志但逡巡鄙儒信頑魯不識要路津枳棘偏荒塗鴟梟
競翔舞中有孤鳳凰哀鳴一何苦十日出天衢龍飛欲
何為不如反深淵俟彼風雨昔世俗多崎嶇達人豈凝

滯公能訪松子予亦從公逝

次韻酬顧武祥

一廛郭外田五畝林間宅追蹤揚子雲希風謝安石春
墟雜沓紅秋逕朦朧碧優游不知老留連轉成癖良朋
茲見訪神交自疇昔臨流暫携手藉蘭仍布席晤言盡
冥契賞心非外索誰謂衡門下亦枉金閨客高士輕官
簿逸人貴仙籍矯首問天路與君同所適

莊生

莊生演黃老孟子述唐虞古今事已異見謂為狂迂章
甫豈不貴越人非所須嗟嗟後代士高論將焉如

林卧

東南月出早林卧不知莫飄蕭石隕籜青熒松泣露意
愜已忘言神遊如有遇空懷寄同好此境莫能賦

留別

素乏霸王略頗深山海情一充南省賦再反東臯耕疎
放日增甚沉痾歲彌嬰好遯愆幽期鳴豫貪浮名進止

苟如此焉能獲利貞初服念不忘遠遊心所輕遲遲去
燕闕眇眇向吳荆薊門雨雪暗廣陵潮水生八公遺桂
樹千里饒蓴羹名勝分可悅心賞遙難并願言慰離索
引領伺同聲

考功集卷三

欽定四庫全書

考功集卷四

明 薛蕙 撰

七言古詩

元夕篇

皇都佳麗地春日艷陽年共愛元宵好爭歌明月篇元
宵明月滿蓬萊春色先從上苑來千門宛轉銀屏隔萬
戶參差金鎖開千門萬戶連雙闕綵女新粧踏明月映
牖窺窓態轉多含嬌凝睇情無歇正逢春日愛芳菲復

值春宵縫舞衣燈光斜照珊瑚枕香氣空薰雲母扉此
時天子盛遨遊離宮別館足風流纔開鳳島張燈架更
起鰲山結綵樓綵樓峇嶺鰲山側複道交衢對南北萬
燭翻疑白日光千燈却亂春星色春星暗靄迷煙霧仙
籞分明見天路空裏翩翩翠蓋飛雲中冉冉鸞輿度翠
蓋鸞輿千萬騎伐鼓撓金動天地御仗層層錦繡圍廣
場隊隊魚龍戲就中別有王侯客三三五五長安陌夜
夜經過許史家朝朝遊戲金張宅金張許史關驕奢金

燈玉帶剪春紗鴛鴦比翼玫瑰樹翡翠雙栖菡萏花龍
膏鳳炬列千行蕙火蘭煙百和香月華照耀瑠璃障霧
影氤氲玳瑁梁可憐豪侈誰能似可憐行樂心無已曲
罷頻移歌舞筵醉後重遊燈火市月市星衢遊未徧東
城南陌時相見妖童繡勒五花馬倡女銀車九華扇妖
童倡女繁華子雙去雙來帝城裏粉色偏從月下明衣
香故向風前起調笑行歌懽未闌浮影流光夜遽殘朝
來試過狹邪路墮靨飄花那忍看

龍虎山歌送范同年汝和

豫章之東龍虎山南斗垂耀當天關祝融廬霍引襟帶
三江九派奔迴還山盤水曲入仙城疊巘層崖上紫清
中天日月照樓閣二十四岩金碧明巖室洞房煙霧裏
玉戶金牕宛相似丹井深通滄海潮翠屏倒挂天河水
翠屏錦壁百千迴綠岫青岑宮殿開羽人龍駕去不返
仙吏仍飛雙鳥來雙鳥朝天還帝鄉飛來飛去名山傍
仙嶠雲霞長不改天壇花藥依然在却向山中寄紫書

故人闕下遙相待

送范師舜調南京兵曹兼訊顧英玉

范雲移官赴南署買舟官河下江去君家住在岷峨西
回首江東望鄉處蜀客吳人解相笑可惜風流本同調
江左應傳洛下吟尚書更羨臺中妙尚書臺中多暇日
相逐郎官騎馬出載酒觀棋樂未稀登山臨水情非一
眼中六代繁華地弔古悲歌動人意治城無復謝公行
新亭曾灑周郎淚君向吳城我燕市年來亦憶尊鱸美

幸為傳聲謝顧榮何時共飲三江水

寶劍篇

昔聞歐冶鑄寶劍治中蛟龍歛揮霍治開火歇蛟龍失
黯黯青雲吐芒鏑赤山丹液色鬱勃白帝金精氣縈薄
翠珉磨出冰洞明寶鞘裝成金錯落鵬鵠膏瑩科斗宇
鹿盧玉映芙蓉萼坐上傳看疾風起尊前拔舞驚虹躍
蚩尤蒼黃化石隕天吳辟易隨潮却果然魑魅忌精爽
坐令神物藏冥漠由來世事不可測須臾淪落豐城側

玉珥彫零苔蘚昏雪花蠹蝕塵沙黑當年得意斷犀象
今朝失路埋荆棘地底龍眠鬼猶泣斗間氣騰人未識
泥塗污辱君勿悲風雲變化時將逼掘獄重開雙寶刀
入市爭酬萬金直自古英雄每如此平生蹉跎長嘆息
哀歌謾作行路難高飛自有橫天翼

義和行

五月日食作

義和東來海神泣丹霞閃爍玄雲急風纏赤道吹星隕
龍闕青冥學人立軒轅太一迷南北蟠桃若木無顏色

上帝巫咸杳不聞仙人側目天門黑

題陳明之畫菊為何子元先生作

憶昔先皇十八年學士風流滿當代就中太僕真瀟灑
至今畫菊流傳在中丞此卷畫更奇秋花錦石雲霧姿
追思盤礴解衣處想見酣歌縱酒時當時畫此蓬萊觀
自謂平生此其冠畫成持贈燕泉公滿堂醉客空嗟嘆
回首斯人已難得長使中丞憐粉墨拂紙偏驚白露寒
開緘稍覺悲風色中丞遠適西南地索我題詩見交誼

百年許與詎偶然萬里提携不相棄陳琳後事不堪論
水部文章今尚存病客安能賦思舊主人須為續招魂
鄭繼之館內積雪為小山戲作長句

君不見少谷子饑寒卧病長安裏長安臘月雪一丈恠
爾朝來何技癢陵晨掃雪為小山數峰突出窓戶間我
時過門訪子入子也階前荷鋤立亂垂散髮雜塵垢斜
挽短衣半沾濕憶子前年覽吳越東游四明尋禹穴慣
矜赤脚踏層冰苦覓黃精斲山雪平生好奇心未已今

朝作戲聊復爾斷冰積雪止俄頃走海驅山宛相似仄
崖崩壁色悽愴玉膏乳竇陰森爽磊砢初驚大禹鑿戍
削翻疑巨靈掌君不見五侯甲第當此時紅羅斗帳流
蘇垂銅盤燒燭綵雲散玉袖拂面香風吹吁嗟如子何
為爾低眉蹙額凍欲死

南唐李昇畫竹題云昇元閣上作賜宋齊邱

南唐草創金陵日君王材藝還非一宮中初學書畫圖
人間早見丹青筆昇元閣上朝置酒九華山人前上壽

興酣點染雲霧飛畫成揮霍蛟龍走瀟湘洞庭洲島畔
雨葉風梢翠凌亂珍重仍兼御字題留傳擬作山人玩
人代悠悠朝市改何言畫本今猶在嗚呼金石亦銷毀
細看粉墨無光彩我持此卷三嘆息英雄割據終何益
虎踞龍蟠尚復存黃旗紫蓋非疇昔富貴繁華如夢寐
千秋萬歲皆相似君不見西京空聚茂陵書傷心不獨
江南事

黃河行贈管汝濟病歸

崑崙播元氣積石歟靈波東南控赤縣西北注黃河黃
河西北來崩浪觸山開天輪蹙驚電地軸沸奔雷雷奔
萬餘里鼓怒何時已懸流白日下漂沫浮雲裏洪波直
射三秦道巨靈擘山山為倒二華峰開菡萏披九巖夾
繞蛟龍抱九巖截薛青天上下有黃河日搖蕩歌岨長
移漁父船清沙好挂僊人杖僊人西歸聊卜築開門正
對黃河曲浦口鳬鷺上石牀雲中薜荔垂茆屋男兒挂
冠苦不早玉體憂來日枯槁爾去應尋河上公我行欲

訪南山皓

送太乙子歸華山

太乙子棄擲腰間組酒酣慷慨拔劍舞闔闔冥冥不可入
西游華山騎白虎騎白虎登金梯金梯高高與雲齊
手翳芝草捫虹霓子先茅龍肯相與隨君翱翔逐玉女
題郭鳴世鶴亭

第五橋東野竹青主人結屋占雲汀扁舟初入泛花水
三徑新開放鶴亭亭下蕭蕭鶴一群含姿弄影雪紛紛

水邊沙暖行春日石上風寒卧白雲白雲浩蕩滄洲遠
憶昔雌雄巢翠巘青田養子衆雛成華表辭鄉千歲返
何年偶被雲蘿制羽毛摧折樊籠際拂霧仍思紫蓋飛
臨風尚想華亭唳小苑斜連鴈鷺陂上林却繞鳳凰池
不須奮翅緱山去相逐鸛鷺集玉墀

梁園歌贈李川父

君不見梁王富侈甲天子國東築園三百里複道崛崎
象河漢曲池潺湲寫海水詔書益賜膏腴地羽獵常從

千萬騎爵馬珍奇外域來賓客游談四方至本期千秋
樂未改奄忽繁華不相待金輿玉輦已零落鴈渚鳬洲
竟安在君不見異時鄒陽趨闕下出入雍容擅文雅寧
知讒人一開口束縛翻為獄吏罵又不見漢廷不重馬
相如謝病因上梁王書浮沉頗與諸生伍枉却當年賦
子虛梁園一旦生秋草二公坎壈何足道人間萬事皆
虛無詎用區區惡懷抱大梁李侯才絕妙司馬鄒生爾
同調江海遙分刺史符文章不待承明詔相逢問訊今

如何命也豈免常蹉跎南歸又復不得意贈子聊作梁園歌

醉歌贈姚汝修

蛟龍未得意居然客泥瀆區區蛭與蚓見之不掛目寧知一旦挾雲霧赤電青蜺下相逐白日收光海水沸南山摧倒為平陸丈夫處世亦如此豎子莫輕天下士君不見張儀南游楚相橫范叔西奔魏齊死姚夫子飲我酒高歌為君起君今骭髀王侯側我時跌宕塵埃裏時

人作色矜權貴笑我摧藏不足畏淮陰仰視里中兒李
廣愁逢霸陵尉勸君第飲君莫辭英雄會合當有時少
年何惜千日醉他日飛騰猶未遲

嵩邱歌送蔣子雲

君不見衡恒泰華奠九州豫州巨鎮名嵩邱中天照耀
白日景后土灌注黃河流往者天皇題寶帙五嶽真形
標第一三花隱映玉女臺二峰羅列仙人室曾聞軒后
駐雲輶復有周儲吟鳳笙緱氏山頭鸞鶴去鼎湖水上

蛟龍迎君看萬乘亦何似古人棄之如脫躡紛紛流俗
笑此言肯把山林易青紫世間萬事俱零落何用明珠
彈鳥雀因嗟季子狹三河轉憶尚平娛五嶽我今思歸
殊未還夢中每每游僊山頗疑羽翼落天外但覺烟霧
非人間君不見謝公李白神蕭爽天姥羅浮夢來往予
也頻夢山中游心知自是神僊流異時最愛安期術擬
卧名山采芝術羽化青雲雖未期肥遯丹崖詎為失送
君南行洛陽道一望嵩山愁絕倒谿口空餘躑躅花澗

中不見菖蒲草薄游已自厭風塵多病祇堪學隱淪
年定訪浮邱伯為掃雲林作主人

鄴都引

君不見當塗父子全盛時鄴都佳麗侔京師芙蓉池上
開朱邸玄武苑中羅羽旗九錫纔終俄受禪宮中更起
文昌殿功臣北闕賜甲第詞客西園侍清宴雄圖擬謂
千萬年于今城闕空雲煙梁沛真人不復起歌舞曾無
銅爵伎西陵誰辨古墓田東流惟見漳河水

夏夜暑甚不寐

手中白團難禦暑冰簟綢縵熱如許
高樓夜半擘衣起
簾前坐看銀河徙想像蓬山殊不惡
桂樹玲瓏蔭珠閣
僊人月下汲玉井海風蕭蕭雲髮冷

酬劉希尹贈古鏡歌

故人遺我魯國之寶鏡遠自燕都寄譙邑
慙慙預恐到
時久封外兼將錦為襲夜來夢君在君側
朝得君書長
歎息開絨寒雪灑衣袂入手秋蟾照顏色
背間篆刻無

人識鳥跡鱗皴土花蝕依稀尚有雙盤龍似我於君連
羽翼當年與君游帝鄉豈意今者遙相望摩挲明鏡覽
愁髮坐驚騷眉生秋霜此時顚賴君不見作詩寄君空
斷腸

寶刀篇

譙國王生名博古故物疊累滿環堵中有百辟之寶刀
太白之精來下土爛如白虹皎如雪紫氣紛紛長不滅
卷之如鈎垂欲折舒之還成三尺鐵異哉神物那可比

堅能割玉柔繞指蛟龍變化廼如此刀雖奇譎不宜爾
王生王生善寶藏何年持之獻我皇指麾上下威四方
廷中佞臣如負芒佞臣屏退進群賢巍巍帝德光配天
小儒敬賦寶刀篇頌聲洋溢千萬年

結交篇

交道之難應有以大都難在無君子小人見利不見義
相與安能保終始憶昔曾為吏部郎四方賓客滿門牆
汝南拔士各題品北海愛才偏激昂一朝余坐大禮罪

被放歸田遂沉廢當時門下結交人去作誰家座上賓
一書不復訪生死半菽那能分賤貧歲寒僅有數君在
餘子悠悠難重陳君不見古人高誼難比儔今人薄惡
真可羞請謝當塗少年輩甘與深山麋鹿游

置酒辭

美人洗拂白玉卮老夫自歌置酒辭桑榆之光能幾時
含情不飲復待誰我生材質無所宜不擬縱任恒矜持
譬如散木不自知欲就繩墨何其癡盛年一去悔可追

却對蛾眉慙鬢絲君不見謝公自是天下寶偃仰東山
頗枯槁平生掩鼻向富貴一見嬋娟翻絕倒人間混濁
殊可憎聊憑尤物娛懷抱屈原湛身亦何補賈生慟哭
空自苦漫將一縷係千鈞祇餘碧血埋黃土九州浩浩
揚洪波念之豈免泣滂沱懷寶迷邦遭詆訶手援天下
可奈何未如閒處且婆娑快飲美酒聽清歌及今為樂
勿蹉跎明年白髮應更多

酬張路寄畫佛及觀音

江夏吳生久物故畫手人間無獨步爾來張子出大梁
又見丹青照縑素奈何絕藝多自惜未許千金換真跡
高士飛揚不易馴貴人造請空無益遙聞病叟耽玄理
為畫釋迦兼大士貫休羅漢殊未工虎頭金粟真堪擬
精舍安居伴白雲玉毫瞻禮對鑪薰他年負入深山去
應寫伽陀重贈君

贈王子正侍御

江漢英靈鍾蜀都蜀之作者何代無嚴揚王馬耀往牒

後有陳李兼三蘇國朝異才楊太史爾來任趙俱名士
同時王子復同調四賢相望頗相似嗟哉王子才為累
正色立朝多論議未能默默御史臺甘作栖栖州縣吏
小州寡事無簿書時時訪我城南居嵇阮偏知酒中趣
莊惠劇談濠上魚君如雲間折翼之孔鸞我如蛟龍失
水而泥蟠百年窮達豈足道祇願長生學黃老俗儒白
首誦陳編舌弊耳聾殊可憐文章成名第小技博學擬
聖非真傳虛生浪死不自悟尚構空言嘲列仙人約

我游峨眉君亦莫負青城期蜀嚴湛冥真我師君家諫
議將何為綏山儻遇騎羊子共附髯龍隨所之

希夷先生墨竹歌

并序

蕙家藏希夷先生墨竹之右先生大書絕句云莫貪
枝葉亦成龍要悟從頭到底空已遇神僊施筆力風
霜不可再磨礪後題云陳圖南作就賦畫之左有章
次道魏仲先二絕句魏并有序其畧言錢公淡成入
華山叅先生先生作此贈之蕙自少時即聞之長老

云昔野人掘地得石函中得此畫而周揮使廣取之
蓋宣德正統間也其後史揮使璵得於廣子文而方
揮使煥復得於璵子經嘉靖丁酉蕙廼得於煥孫顯
宗蕙觀先生詩窮理入微蓋非後世詩人所能言而
其字體雄偉不凡兼有古人之法度亦非近代書家
之比也鄉使得於外郡莫詳所自則其真贋亦不能
明幸而出自吾鄉為數故家所傳事跡彰著衆人皆
能言之其為先生真跡可信不疑然數故家皆武人

莫知先生為何如人雖頗愛重此畫而不知其為希
世之寶也又幸毫地不當要衝故此畫得為吾鄉舊
物歷百有餘年而蕙得之不然已為有力者取之他
所矣蕙嘗讀邵子擊壤集有觀先生真及墨跡三絕
句云未見希夷真未見希夷跡徒聞希夷名希夷心
未識既見希夷跡復見希夷真始知今與古天下常
有人希夷真可觀希夷墨可傳希夷心一片不可得
而言於戲後世不為不知先生顧其知先生甚淺如

邵子所謂不可得而言者此豈世俗之所能知哉有能真知其說然後知先生之道超然天地之始彼神僊云者其殆強為之名乎抑先生之詩固以一切皆空豈獨有所謂神僊耶邵子之意亦若是也雖然世無邵子孰不以斯言為孟浪之言夫嘉靖庚子歲秋七月大寧居士薛蕙識

水墨淋漓數莖竹琅玕不羨多成束飛白玲瓏一片石夜光休誇大盈尺云何此畫價無敵廼是希夷之真跡

列仙籍中多品流先生況是神仙伯宣靖仙材亦不群
尋師遙入華山雲解顏一盼不易得敢望揮毫遺此君
畫首題詩兼姓字鳳翥龍蟠三十四丁寧舉似一轉語
截斷世間無限事領略真仙上上機叅同古佛空空義
古來畫史雖無數爭似仙人得天趣筆勢翩翩入三昧
玄旨明明標一句梵經合受天人禮仙跡那無鬼神護
五百年來如電過一幅霜縑完未破湍水東流鶴不歸
峨眉西逝龍猶卧故鄉之子慕神仙偶收圖畫如有緣

錦囊新裝綠玉軸彤管更賦青霞篇安得至寶不磨滅
期與好事相流傳先生聞此應大笑水中捉月真可憐

希夷先生墨竹短歌

大寧齋中至人竹浙浙天風撼蒼玉大書詩畫真三絕
價敵宣和六千軸伊川空有句傳神世俗寧知偽與真
祇恐明珠終暗擲此君他日與何人

文徵仲畫老子見贈舊寄觀音像併此奉謝

本家楚潁鄉遠師周柱史流沙竟長往谷神應不死真

源古縣近西原祠宇荒涼舊宅存不見猶龍寫生色祇
同摸象解空言衡山先生今顧陸贈我真人真一幅天
機淵默藏根柢日角分明辨眉目先生高士非畫師一
紙千金難易之四方求者苦不得我未往求先見遺往
年曾寄圓通像髣髴白衣來海上今者揮毫圖伯陽恍
惚青牛歸故鄉老夫家居貧轉劇偶然富與公侯敵簞
瓢匱乏無斗儲篋積緘滕有雙璧平生嗜好釋與仙幸
遭同病還相憐已將彩繪作佛事更擬形似傳靈筌學

通二氏我何有畫備六法誰能先不慚俚調酬妙品往來聊結三生緣

贈袁貞白

故人昔訪我翫月新秋節十年重命駕復對春宵月故人真有古人情明月故向今宵明可憐明月如盟主知君與我心相許結交肯與流俗同此心願學延平翁

張南園畫雲南圖

嘗聞司徒作者流暮年畫思生滄洲丹青點拂隨興到

雲霧幻眇令人愁君不見益州形勝佳且殊可惜僻在
西南隅中原斷絕罕人跡遂使吳越矜區區司徒平生
生此都文學才氣海內無獨憐山水久寂寞因之貌作
雲南圖大山小山相盤拏龍鱗攢羅插虎牙洪波萬折
走其下石根奔蹙如蛟蛇行人含顰色咨嗟鳥道上被
青天遮巖披谷圻有平地孤城百雉千人家生綃淡墨
勢頗窄萬里滇池氣相敵山川空濶神為開不覺沉吟
悲古跡古來此地號邊鄙邪指牂柯連越嶲秦代新開

五尺道漢家更代昆明水嶺陬海落通中夏翡翠明珠
半天下始聞大將泛樓船復遣詞臣祝金馬只今郡縣
窮南土風俗相傳勝前古世封刺史上計書附塞蠻夷
占編戶何況司徒此間出文獻從今更難匹山中已報
鮮銀魚世上仍看留綵筆我言此卷真奇最不獨毫端
工粉繪應同蜀相畫夷圖想見成周作王會

東方朔竊桃圖為許封君題

弱流西下崑崙畔石閣丹梯起樓觀綠水旁縈赤玉林

白雲微映空青岸昔年阿母栽桃樹桃葉桃花已無數
青鳥飛時屢自迷仙人折罷翻相妬浮生變化如雲烟
此花一實三千年隣家小兒亦何物往往竊實來山前
自從脫幘金門裏賣藥逃名會稽市神仙恍惚難具論
粉繪依稀無乃是海東之翁許遠游有道似是東方儔
未肯朝天取卿相時聞縮地游滄洲短褐匡牀成隱居
養鷄牧豕混樵漁題詩遠寄看圖畫操杖終期問素書

題竹

使君擁千騎，蹋雪向長安。雪中芳草盡，零落贈此青錦。
金琅玕江南，邱墟繞江水中。有琅玕拂雲起，應龍夜穿
崖石裂。江妃朝游，春雨歇。風梳露洗，助嬋娟。沙崩水濺，
映潺湲。坐看綵筆題苔蘚，想見翠葆搖風煙。只今四海
歌太平，甘露晝降黃河清。願言植此玉墀側，會聽丹山
鳳鳥鳴。

梅花用東坡韻


朔雲凍壓江南村，春風解返梅花魂。貞心習慣冰霜苦，

正色不受塵沙昏平生愛花同臭味好事寄我栽郊園
最憐一樹傲霜霰遠勝百卉凋涼溫誰將錦軸寫踈影
恍如金粉迎朝暎未邀皂蓋宴野圃已報畫戟朝天門
嗟予多病但高卧對此欲賦將何言夜來雪罷郡齋冷
莫辭看畫開清樽

泣玉行

楚國獻玉人抱玉山中哭不見賞千金徒聞則雙足一
國之人皆若狂玉為石兮石為玉世俗是非雖反覆礫

石何榮玉何辱被褐懷玉真丈夫哀哀泣玉何為乎



考功集卷四